

Mahkamah tolak rayuan SPRM
Malaysiakini.com
July 12, 2010

Mahkamah Tinggi Kuala Lumpur hari ini menolak rayuan Suruhanjaya Pencegahan Rasuah Malaysia (SPRM) terhadap keputusan Mahkamah Sesyen melepaskan dan membebaskan seorang anggota polis daripada tuduhan menerima rasuah, lima tahun lepas.

Ketika menolak rayuan itu, Hakim Datuk Ghazali Cha berkata keputusan itu dibuat mengikut pertimbangan maksima berdasarkan keterangan dan kredibiliti pengadu dalam kes Lans Koperal Mohd Rahizan Mohd Ashri.

"Berdasarkan keterangan, pengadu Sirat Miswar mempunyai motif tertentu dan mempunyai niat membalas dendam...justeru itu mahkamah tidak akan mengusik keputusan hakim Mahkamah Sesyen," katanya.

Pada 21 Julai 2005, Mohd Rahizan, 39, dari Ibu Pejabat Daerah Dang Wangi dihadapkan ke Mahkamah Sesyen Kuala Lumpur atas dua tuduhan menerima rasuah daripada Sirat di kawasan letak kereta Kedutaan Indonesia di ibunegara.

Beliau didakwa menerima rasuah RM300 daripada Sirat pada 4 Januari 2005 bagi mengelakkan tindakan undang-undang diambil ke atas pengadu kerana memiliki pasport orang lain dan RM100 lagi pada keesokan harinya di tempat yang sama.

Mohd Rahizan didakwa mengikut Seksyen 11(a) Akta Pencegahan Rasuah 1997 dan boleh dihukum mengikut Seksyen 16 akta sama yang membawa hukuman penjara minimum 14 hari hingga 20 tahun dan denda sehingga RM10,000, jika sabit kesalahan.

Pada September tahun lepas, Hakim Mahkamah Sesyen Anita Harun membuat keputusan melepaskan dan membebaskan Mohd Rahizan daripada tuduhan itu.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/137101>